

高陵縣鄉土志



高陵縣鄉土志

歷史

高陵之名始見於秦昭襄公封其弟市為高陵君其得封年月不可得詳當是昭襄初立之歲即周赧王之九年也是時秦已併諸小鄉聚為之縣如縣蒲縣藍田縣櫟陽已見於六十年以前櫟陽距高陵四五十里耳故郡縣釋名及元和志均謂高陵為秦舊縣說非無據則高陵之為縣名斷自秦始然地省併非常即名亦紛更罔定目撮其大凡以朝代比次焉

虞夏時高陵為雍州地禹貢涇屬渭汭注云水相入為汭又水北曰汭今涇水入渭確在縣南上馬渡

周都鄠郛縣當為周畿內地東遷後賜秦襄公以郿邽之地後遂併為秦有

秦孝公置左輔都尉於此見漢書地理志注 秦始皇二十六年分天下為三十六郡縣為內史屬地見始皇本紀

漢為左馮翊地高帝二年改秦內史為河上郡九年復為內史武帝建元六年分為左內史太初元年又改左內史為左馮翊縣二十四首高陵見漢書地理志注 景帝五年作陽陵邑見本紀陽陵亦屬左馮翊地理志注故弋陽景帝更名莽曰渭陽襄宇記陽陵故城在咸陽東北四十一里禹貢雖指高陵西南三十里有陽陵故城今其地有景帝陵張晏注作壽陵起邑信然蓋析高陵西南地而為之莽改曰千春地理志注左輔都尉治東漢陽陵屬京兆後漢郡國志陽陵故屬馮翊高陵屬左馮翊兼



左馮翊治後漢郡國志注光武東都後馮翊出治高陵建武十五年改屬京兆見玉海

魏改曰高陸屬京兆郡文帝黃初二年改見通典以後歷晉而魏而西魏而北周仍其名不改惟魏地形志稱晉屬京兆魏明帝改屬馮翊耳

隋復為高陵大業初改見隋地理志

唐仍隋舊曰高陵屬京兆府京兆尋改雍州旋復為京兆縣皆隨隸焉武德二年分縣西南境為鹿苑縣貞觀元年廢鹿苑入高陵天授二年置鴻州領渭南慶山高陵櫟陽鴻門五縣尋廢還入雍州

宋高陵屬永興軍

金高陵屬京兆府

元高陵屬奉元路

明高陵屬西安府

前清仍明舊

縣在秦漢間為大府建節之地自唐會昌中析清平鄉於三原明興以臨潼為驛路又舉東南數里而畀之以故四周環隣之縣皆巨而高陵獨小考現今形勢西南贏而東北縮以方罨揆之縱橫均不踰三十里蓋繁簡之制殊也而縣得名最早一稱誦之不能無今昔之慨云又唐以後五季迭興五十餘年更代八姓其縣屬不常其得失大半仍沿舊稱殆有不暇于此者歟

姓氏

世風不古久矣矜門閥者李必隴西劉必彭城崔必博陵及問其舊德先疇有不得而言之者嗚乎自井田廢而民之遷徙轉移例不得而禁故有一本之親偶經時易地隔並名字世次不得而舉者矣今謹擇可據者得十五姓餘無所考見槩從省于氏係出北周于謹之後于謹自洛陽從魏武帝入關仕周因家高陵唐于志寧即其曾孫也今傳四十一代

喬氏黃帝英橋山子孫守塚因為姓後宋為喬宋時自晉遷高陵傳十八代

商氏係商君後衛鞅亡魏入秦為孝公相封于商以地為氏洪武初由晉遷高陵傳十三代

吳氏係出周秦伯後封于吳後人以國為氏南宋時自晉遷高陵傳十五代

張氏係出軒轅第五子暉為弓正世掌其職後增長為張魏時張既即其遠祖馬傳六十七代

楊氏係出漢太尉震之後

馬氏係出伯益之後趙奢封馬服君遂以為姓

孫氏係出武公惠孫曾耳為衛上卿以字為姓

邱氏係出漢上郡太守邱柱之後

呂氏係出呂望後昔太嶽封為呂侯以爵為氏宋時有呂世昌者避亂由晉陵遷高陵自世昌至涇野七代自涇野至今十一代共十八代

墨氏係出孤竹君墨胎氏世居縣東墨張堡

裴氏係出伯益之後秦非子之孫封裴鄉侯以邑為氏宋時自晉
遷高陵傳十六代

杜氏係出劉累之後元末自省南杜曲遷高陵傳十一代

樊氏係出虞仲支孫食采於樊以地為氏相傳避宋時亂由富平
遷高陵

李氏係出伯益之後先世為理官嗣改理為李以官為氏明洪武
初自晉遷高陵傳一十二世

宗教

縣俗不信佛故境內無佛徒然鄉人祀神之所往往有道士者託鉢焉其數不踰十人承其流者俗稱為女居士類皆孀居老而無子者其術第誦經茹素為人司祈禳與巫覡者畧相等不足以言教而稱盛者則惟泰西之天主教耶蘇教次之

天主教自前清乾隆二十五年始有方教士者意大利人自山西來縣西通遠坊僕從二三人賃民屋廡焉初假為市賃者後漸演其說然從者寥寥同治元年回變作大肆殺戮有教士者出與叛回之渠者相約無犯吾教於是附近之居民紛紛投教平息後頗有脫其籍者光緒三年大飢教士高一志出賑救貧民急欲得食食其粟者遂立誓為教中人不復出縣民約在教男

女有七百人近來勢力頗增益務擴張不問賢愚概准其習教故縣境流寓之民與齊民有夙忌者往往藉入教以競勝而縣民之在教者尚奉縣官約束維謹不敢少違異蓋其入教之初實迫於勢之不得已也教堂占地一百六十餘畝起樓高三層墻壁純用磚灰甃塗之環樓複屋小舍共三百餘間男經堂一女經堂一又有學堂育嬰堂養病院皆峻整可觀堂內西教士四人中教士八人西女教士十四人學童八十六名執役十八名收卹窮民大小男女二百八十二丁口教民散處各村然皆附近教堂左右其教規男子一人入教男子之家人皆教民也約計其數有一千三百一十有奇

耶蘇教起于英教士敦崇禮前清光緒二十五年又遣教士邵滌

源及二三教徒來縣賃縣東街民房為教堂禮拜日演說其教
與天主教宗旨頗殊其規約亦稍寬不以一人在教俾家之人
皆從教今又移居正街商民舖之間縣民之從教者約百有五
人

實業

縣男丁二萬四千八百八十二約刪去老疾游惰之不任職事及雜執他技者四百餘人餘皆有實業茲以約分法該括之

士約百分之二自前清科舉停止士額遂減然充其舊額亦止三百六十餘近則服田者衆而作賈者亦有

農約十分之八縣民重視農務士與工商率皆略知稼穡故農十倍他數

工約百分之五工皆蹈習故常無殊異者木工為車為室屋為棺為桌几全工為釵釧女飾用銀為鉏鋤鐵鑊用鐵皮工為牛馬駕車鞦轡之屬土工為井窰為版築為室屋陶人為盆

缶為罍瓦脊獸染人為染布設色之人油漆門材造明器蠶桑僅有為者紡綿織布幾于比戶皆然又有內外科醫及彈棉製油各業不以工名亦皆專習而成然無多

商約有二十分之三縣境不當衝要故市不繁盛所有以商業著名者除典當及粟花兩行外餘皆雜市零星小貨且半皆農民農暇則從事于商無專業故不列于內

地理

地理原以天然之形勝為宗建置其隨時變更者不得特重
茲及祠宇者存古蹟也學堂者紀新政也其餘祠廟衙署例
置而與他縣同者不再著

縣治在省城東北七十里

縣治東界臨潼南界咸寧西南隅界咸陽西界涇陽北界三原
縣境分為四區曰中區曰智字區仁字區曰勇字區

中區在縣城內周約四里六分有奇東界仁字區東南界勇字
區西南界智字區北及西北均與仁字區為界

古蹟 距河門外北偏有后土宮西院即明儒呂涇野講學
處顏其室曰雲槐精舍舍經變久廢北槐亦無存者前清光

緒三十一年移建城內縣立高等小學校西偏 元儒楊文

康公祠在城內東街公諱恭懿康熙十年重建 東岳廟在
城內北街建修無年月然甚早 祐元觀在城內西街明正

統元年建近興東岳廟均改設學校 蓮池在南城外東偏
元時知縣王珪引白渠水注之今廢

學校 縣立高等小學校一縣立初等小學校一縣立初等
女子小學校一城立初等小學校二 據民國二年調查之數

智字區在中區之西南周約七十五里東界勇字區南界咸寧

縣境西南隅界咸陽縣境西界涇陽縣境北界仁字區

古蹟 漢之馮翊城在縣西南二里 淨土樹按名山記淨

土樹在高陵縣南八里俗傳西域鳩摩羅什憇此覆其履土

遂生茲樹二月開花如楊八月結實狀如小栗殼中皆黃土
今無存 上騎都尉馮公祠在縣西南七里公諱本長安信
都人仕後周為錦州參軍丁憂去官結廬在墓負土成墳有
周朝隱撰紀存碑 東渭橋即唐李晟屯兵處 阿石橋高
望渠所經即白公渠之支渠 齊大夫晏子廟晏村人祀之
縣志云祀之說無所據豈出使在秦後人慕其人而祀之
昆沙鎮金史地理志高陵有昆沙鎮宋置承信郎監酒稅官
一人今為昆沙里鎮有東嶽廟漢文帝自代來次鎮四日舊
傳廟為漢文帝宅廟會在八月十五日即帝誕辰也與諸東
嶽廟會不同 崇皇寺舊傳即文帝誕生處薄后被呂后妬
出居於代州時薄后方娠至崇皇寺地文帝誕生故其地稱

降駕原云然皆無考 十春故城在縣西一里王莽改建漢
張耳墓趙真女墓均在今李趙村 陽陵故城在鹿苑原上
漢景帝五年作陽陵邑 景帝陵在鹿苑原上帝王世紀曰
陽陵山房百有二十步高四丈唐武德元年折置鹿苑縣即
此 鹿苑果園在鹿臺下三輔黃圖云安陵有鹿苑果園
鹿台神廟在鹿苑原上相傳神即佐軒轅黃帝破蚩尤者事
遠可疑旁有雷石風洞俗謂之雨磨以禱雨多應也 李廣
墓在良村原上俗稱李將軍墓漢書載賜廣塚地於陽陵
學校 鄉立初等小學校十五私立初等小學校二

仁字區在中區之北及東周約九十里東界臨潼縣境南界中
區及智勇二區西界涇陽縣境北界三原縣境

古蹟 龍躍宮唐高祖舊宅在今李觀村武德中以奉義宮
改建武德七年十二月丁卯高祖入龍躍宮八年十月壬午
復如龍躍宮德宗改為修真觀有神堯真容及御井靈相梁
開平間廢今八角井口在龍泉寺俗猶稱御井云 劉公廟
在彭城開祀唐縣令劉仁師 竹林寺在小村王祀宋寇萊
公明嘉靖辛丑陝西巡撫趙廷瑞禮聘三原馬谿田本邑呂
涇野雨先生修陝西通志開館於此 晉文公廟在通遠門
北三里文公為公子時出亡在秦秦康公送之作渭陽詩故
邑有廟云

學校 鄉立初等小學校十一私立初等小學校一
勇字區在中區之東南周約六十七里東界臨潼縣境南界咸

寧縣境西界智字區西北隅界中區

古蹟 西平王李公祠王諱晟其先隴西人後徙京北墓在
渭橋渡之東墓前舊有祠西向今廢墓碑尚存裴度撰文柳
公權書 照慧院有塔唐大中年建 清真觀在吳村志載
社人建觀時狀縣曰清真古觀也西魏文帝常遊過觀觀中
有石槽水嘗盈以飲隨駕馬千餘匹不涸文帝異之遂敕建
此觀并給地若干以贍觀士云白雲洞在觀內涇野子有記
見縣志

學校 鎮立初等小學校一鄉立初等小學校十三私立初
等小學一

山 縣境無山有原二曰奉政曰鹿苑

奉政原一名降駕原在本境治所之西南東西長三十餘里
鹿苑原一名鹿台在本境治所之西南東西長十五里
水 縣境有涇渭二河皆經流之水又有渠五曰中白曰中南

曰高望曰禍南曰昌連

涇河發源今甘肅平涼府平涼縣笄頭山東南流至涇陽永樂
鎮入縣境在縣治所西南三十里又東經泥沙鎮南鹿苑原
北至船張村入渭行境內十里

渭河發源今甘肅鞏昌府渭源縣烏鼠山東南流至長安咸寧
二縣北入縣境在縣境治所西南三十五里向東北流至船
張村有涇河自西北來注之又東流經渭橋渡奉政原之南
至夾灘出本境在縣治所東南二十五里入臨潼縣境行境

內三十里

中白渠由治所西北三十里彭城堰承白渠水向東流經仁村
又東過常家村至臨潼縣境注清河行境內三十五里

中南渠由治所西北二十五里彭城堰南限承中白渠水向東
流經坳下村高橋又東過孝義坊至臨潼縣境注清河行境
內三十五里

高望渠由治所西北二十五里磨子橋承中南渠水向東南行
經魏村李趙村之間又東過阿石橋陳陽村至臨潼縣境注
渭行境內三十五里

禍南渠由治所西北二十五里磨子橋承中南渠水向西南流
折而東南經泥沙鎮又東南過崇皇寺至船張村注渭行境

內三十里

昌連渠由治所西北十五里張市里承中南渠水向東流經通
達門下又東過郭橋至臨潼縣境注清河行境內三十里

按渠本白公舊蹟自涇依渠仰引導無術當道者改鑿仲
山泉水注之水本無多然涇陽縣民又私擁之縣渠經數
月水不一至渠亦領羊之存焉耳

道路

自城東行五里經三皇廟至墨張堡與右支路會其支路東南自雨金屯來經小趙江流等村行二十五里來會本路又向東行五六里過東樊村至張家堡左分一支路向東北行二十里行郭橋至臨潼縣境之櫟陽本路又向正東行入臨潼縣境三十里至交口與櫟陽至渭南縣之路接

自城南行十里經阿石橋至小寨堡與櫟陽至渭橋支路會其支路自東北來經郭橋行三十五里來會本路又向南行五里逾奉政原至渭橋渡過渭河分二路一西入咸寧境行十五里至新築鎮一南行五里至耿家集折而西南入咸寧境行三十里過灞橋與臨潼至西安省會官路接

自城西行十里為李觀村又行十里至康橋馬自西北來支路由三原縣行二十里來會本路又向西行左分一支其支路向西南行十五里經南吳里至新興鎮本路又向西入涇陽境行三十里過永樂鎮官道村抵涇陽縣治

自城北行五里為高橋又行三里至卿店與西南來支路會其路經店子頭自張市里行二十里來會東路又向北行分左右二支左支向西北行三里至仁村右支向東北行四里至王化村及上石邸家均入三原縣境本路又向北行二里許即三原縣境又行二十里渡清河至王店鎮與陂西鎮至耀州之路接自城東南行十里經陳陽村至大寨堡與渭橋渡至櫟陽支路會其路自西南來逾奉政原經小寨村行十里來會本路又向

東南行十里經原上原後各村至嘴頭右分一支路向西南行五里逾奉政原至吳村八堡本路又向東南行至臨潼縣之北田王鎮與櫟陽至臨潼縣之路接

自城西南行分左右二路左路十里為軍莊又行十里為黃家渡過涇河左分一支向東南行五里經雷賈村至陳家灘本路又向西南行十里逾鹿苑原至梁村又行五里渡渭河入咸寧縣境又行三十五里入長安縣境右路十里為石家莊折而西行十里至昆沙堡右又分一支向西北經灣而雷村入涇陽縣境行十里至涇陽之永樂鎮本路又向西行十里至新興鎮與由三原至省會之大路接

自城東北行分左右二路右路行五里至裴家堡左分一支其支路向北行十五里即三原縣之陂西鎮本路又向東北行五里至三渡村入三原縣境又行二十里至臨潼縣之櫟陽左路行七里為齊家堡又行五里至灣裏趙村入三原縣境折而北行十里仍至三原之陂西鎮與由五龍廟至富平縣之路接自城西北行五里為鄧家寨又行五里經通遠坊至香王村與張市里自西南來支路會其路經店子頭行十五里來會本路又向西北行五里至灰堆坡右分一支向北行五里至袁羅等村本路又向西北行五里過中白渠上至關家寺入三原縣境又向西北行二十里抵三原縣治

兵事

按秦自孝公徙治櫟陽東至河縣即為畿內地不應有兵事然孝公以前桓公二十六年晉率諸侯伐秦兵敗被追至涇而還又景公十八年晉悼公又追秦軍渡涇至棧林而還秦都城陽與高陵僅界一水東西不遠百里二役也其去縣境當不遠然不能確指所在漢沛公自武關入擊秦軍在藍田南破秦軍後使人行至縣鄉邑告諭吏民皆安堵如故縣之有兵事故叙自漢以下

更始末赤眉至高陵王匡等迎降

光武建武元年赤眉入長安更始奔高陵

晉安帝義熙十三年八月劉裕伐軍軍次潼關謀進取之計王

鎮惡請由河入渭是時秦鎮北將軍屯兵涇上鎮惡遣毛德祖擊破之約至渭橋鎮惡泝渭而上乘蒙衝小艦引船者皆在艦內秦人見艦泝進艦外不見行船人北士素無舟楫莫不驚以為神至渭橋鎮惡令將士食畢棄艦登岸渭水流急諸艦悉逐流而去時姚泓屯軍長安城下鎮惡撫慰士卒曰卿諸人家在江南此長安城北門外去家萬里而乘艦衣糧已逐流而去惟宜死戰可以立功否則無遺類矣乃身先士卒騰踴爭先姚泓軍士奔潰遂入長安

懷帝永嘉六年晉足與胡彭蕩仲結為兄弟蕩仲助足復入安定愍帝以足為驃騎將軍雍州刺史足復伐長安劉曜距之大敗曜中流矢退走足追之至於甘泉旋至渭橋襲蕩仲殺之晉

書有傳

唐高祖武德九年頡利率十萬餘騎襲武功已外進攻高陵行軍總管大將軍尉遲敬德戰於涇陽大破之獲侯劬阿史德烏沒曷斬首千餘級癸未頡利遣其腹心執失思力入朝為覘形勢太宗謂之曰我與突厥面自和親汝皆背之我又賜汝父子玉帛極多何故將兵入我畿縣遂繫於門下省太宗與侍中高士廉等馳六騎幸渭水之上與頡利隔津而語責以負約俄而衆軍繼至頡利見軍容大盛又執失思力被拘由是大思太宗獨與頡利臨水交言麾諸軍卻而陣焉蕭瑀以輕敵諫太宗曰吾已籌之熟矣夫突厥所以直入渭濱聞我新有內難朕又初即位若閉門延敵虜必大掠強弱之勢在此一舉頡利果請和而

而見突厥傳

代宗永泰元年懷恩說吐蕃回紇党項羌渾刺奴等三十萬掠涇邠躡鳳翔入醜泉奉天京師大震於是帝命李忠臣屯渭橋副都庭王與馬璘率五千人均屯渭橋西窰底見郭子儀都庭王各傳

德宗建中四年奉天朱泚進逼長安劉德信高秉舊自汝州取沙苑馬五百疋昭應戰思子陵西三敗賊遂次東渭橋出游弈軍以逼都城

興元元年德宗在奉天詔晟赴難晟承認泣下引軍踰飛狐次代州由蒲津濟河抵渭北塋東渭橋時朔方節度使李懷光亦自河北赴難軍咸陽奏請與晟合軍晟由東渭橋復引軍至陳